



Կարգապահական գործ թիվ ԿԳ-17059

Հայաստանի Հանրապետության փաստաբանների պալատի խորհրդի
2018 թվականի 13 փետրվարի թիվ 23-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/16-Ա

**ՓԱՍՏԱԲԱՆ ՏԻԳՐԱՆ ՀԱՅՐԱՊԵՏՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ**

ՀՀ փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող՝ Տիգրան Խուրշուդյանի, Խորհրդի անդամներ՝ Մելանյա Առուստամյանի, Սիմոն Բաբայանի, Հարություն Հարությունյանի, Նելլի Հարությունյանի, Կարեն Մեժլումյանի, Կարեն Սարգսյանի կազմով քարտուղարությամբ՝ Նոննա Համբարձումյանի, քննության առնելով փաստաբան Տիգրան Հայրապետյանին (արտոնագիր՝ 159) (**այսուհետ նաև՝ Պատասխանող**) կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

11.07.2017թ. Պալատ մուտքագրվել է Երևան քաղաքի Աջափնյակ և Դավթաշեն վարչական շրջանների ընդհանուր իրավասության դատարանի (**այսուհետ նաև՝ Դատարան կամ Դիմող**) դատավոր Տ. Գրիգորյանի՝ «Դատական սանկցիա կիրառելու մասին» 04.07.2017թ. որոշումը (**այսուհետ նաև՝ Որոշում կամ Դատական սանկցիա**), որում նշվել է, որ Դատարանի վարույթում քննվող թիվ ԵԱԴԴ/0028/01/17 քրեական գործով 2017թ. հուլիսի 4-ին՝ ժամը 11:00-ին նշանակված դատական նիստին ամբաստանյալ Ժիրայր Սեֆիլյանի պաշտպան Տիգրան Հայրապետյանը չի ներկայացել, չնայած պատշաճ ձևով ծանուցված է եղել դատական նիստի ժամանակի և վայրի մասին:

Դատարանը որոշմամբ մեջբերել է նաև սույն քրեական գործով ամբաստանյալ Ժիրայր Սեֆիլյանի պաշտպան Տիգրան Հայրապետյանի 30.06.2017թ. հայտարարությունն առ այն, որ Տիգրան Հայրապետյանը լիազորված չէ, առանց իր պաշտպանյալ Ժիրայր Սեֆիլյանի մասնակցության, մասնակցել դատական նիստի և ունի պաշտպանյալի հանձնարարությունն իր բացակայության ժամանակ չմասնակցել դատական նիստի,

ուստի՝ չկարողանալով իր պաշտպանյալի դիրքորոշմանը հակառակ դիրքորոշում ընդունել՝ դատական նիստից իր բացակայությունը խնդրել է չդիտել որպես նախազահող դատավորի կարգադրություններին չենթարկվելու հանգամանք:

Դատարանը, Որոշմամբ վկայակոչելով նշված փաստական հանգամանքները և վերլուծելով ՀՀ քրեական դատավարության օրենսգրքի (**այսուհետ նաև՝ ՔԴՕ**) 73-րդ հոդվածի 5-րդ մասը, 314.¹-րդ հոդվածի 1-ին և 7-րդ մասերը, ՀՀ դատական օրենսգրքի 6-րդ հոդվածը, «Փաստաբանության մասին» ՀՀ օրենքի (**այսուհետ նաև՝ Օրենք**) 19-րդ և 20-րդ հոդվածները, 21-րդ հոդվածի 1-ին և 5-րդ մասերը և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված «Փաստաբանի վարքագծի կանոնագրքի» (**այսուհետ նաև՝ Կանոնագիրք**) 3.1.6, 3.1.7, 3.5.1, 3.5.5 ենթակետերը և 4.1 կետը, գտել է, որ փաստաբան Տիգրան Հայրապետյանը չարամտորեն խուսափել է 04.07.2017թ.՝ ժամը 11:00-ին նշանակված դատական նիստին ներկայանալուց և առանց հարգելի պատճառի՝ չի կատարել քրեական վարույթն իրականացնող մարմնի կանչով ներկայանալու իր դատավարական պարտականությունը, ինչով անհարգալից վերաբերմունք է դրսևորել դատարանի նկատմամբ: Դատարանը գտել է նաև, որ փաստաբանը չէր կարող ընդունել իր վստահորդի կողմից վկայակոչված հանձնարարությունը, քանի որ այն անօրինական է: Ավելին՝ փաստաբան Տիգրան Հայրապետյանը պարտավոր էր իր վստահորդին պարզաբանել հիշյալ հանձնարարության կիրառման անթույլատրելիության մասին և ցույց տալ արդյունքի հասնելու օրինական ճանապարհը, իսկ եթե չհաջողվեր վստահորդի հետ համաձայնության գալ և նրան հետ պահել անօրինական միջոցների կիրառման մտադրությունից, ապա նա պարտավոր էր հրաժարվել վստահորդի հանձնարարությունն ընդունելուց: Բացի այդ, ընդունելով իր վստահորդի անօրինական հանձնարարությունը, փաստաբան Տիգրան Հայրապետյանը հաշվի չի առել նաև այն կատարելու իր մասնագիտական հնարավորությունները և անտեսել է, որ այն ընդունելու արդյունքում Կանոնագրքով ներկայացվող պահանջներն իր կողմից չեն կարող պահպանվել, ինչպես նաև կխախտվեն քրեական վարույթն իրականացնող մարմնի կանչով ներկայանալու, դատական նիստը նախազահողի օրինական կարգադրություններին ենթարկվելու և առանց նախազահողի թույլտվության՝ դատական նիստերի դահլիճը չլքելու իր քրեադատավարական պարտականությունները, ինչն անթույլատրելի է: Վստահորդի հանձնարարությունը կատարելու ընթացքում փաստաբանին չի թույլատրվում օգտվել օրենքով արգելված միջոցներից: Բացի այդ, փաստաբանն ունի դատարանի կողմից կիրառվող վարվելակերպի կանոններին ենթարկվելու պարտականություն և պարտավոր է հարգանքով վերաբերվել դատավորին և դատավարության մյուս մասնկիցներին:

Դատարանը 04.07.2017թ. կայացրել է «Դատական սանկցիա կիրառելու մասին» որոշում, որով որոշել է *փաստաբան Տիգրան Հայրապետյանի նկատմամբ կիրառել դատական սանկցիա՝ պարասխանարկության ենթարկելու վերաբերյալ դիմումով դիմելով փաստաբանական պալատ:*

2. Կարգապահական վարույթ հարուցելու մասին որոշումը.

Պալատի նախագահի 01.08.2017թ. թիվ 217-Ա/ԿԳ-17059 որոշմամբ փաստաբան Տիգրան Հայրապետյանի նկատմամբ հարուցվել է կարգապահական վարույթ՝ Կանոնագրքի 4.1 կետի պահանջների խախտման հատկանիշներով:

04.08.2017թ. կարգապահական գործը հանձնվել է կարգապահական գործը նախապատրաստող անձ Արմեն Սիմոնյանին:

3. Դիմողի և Պատասխանողի համառոտ բացատրությունները, վկաների ցուցմունքները.

3.1. Դիմողի համառոտ բացատրությունները.

Գործի նախապատրաստման ընթացքում Դիմողը բացատրություն չի ներկայացրել: Խորհրդի նիստին Դիմողը չի ներկայացել, թեև պատշաճ ծանուցվել է Խորհրդի նիստի վայրի, օրվա և ժամի մասին:

3.2. Պատասխանողի համառոտ բացատրությունները.

Գործի նախապատրաստման ընթացքում Պատասխանող Տիգրան Հայրապետյանը ներկայացրել է բացատրություն, որի համաձայն՝ դատական սանկցիայի որոշման մեջ նշված այն հանգամանքը, որ դատավոր Տ. Գրիգորյանը դատավարության մասնակիցների հետ համաձայնեցրել է, որ դատական նիստերն անցկացվեն ամեն երեքշաբթի և ուրբաթ օրերին, չի համապատասխանում իրականությունը, քանի որ դատավորը նիստի օր չի համաձայնեցրել, այլ ուղղակի հայտարարել է, որ նիստերը տեղի կունենան այդ օրերին:

Պատասխանողն առաջին նիստին դիմել է դատավորին նշված հարցի վերաբերյալ կարծիք հայտնելու, ինչպես նաև մի շարք այլ հանգամանքների կապակցությամբ առարկություն ներկայացնելու համար, դատավորը հստակորեն խոստացել է իրեն ձայն տալ, սակայն ձայն չի տվել:

Պատասխանողը մատնանշել է ՀՀ քրեական դատավարության օրենսգիրքը, որը դատավորի համար հստակ պարտավորություն է սահմանում նիստի օրերն ու ժամերը համաձայնեցնել դատավարության մասնակիցների համար, մինչդեռ դատավորը խախտել է օրենքի այդ դրույթը և դատավարության մասնակիցների հետ դատական նիստերի օր և ժամ չի համաձայնեցրել: Ուստի՝ ըստ Պատասխանողի՝ խոսել այն մասին, որ ինքը պարտավոր էր ներկայանալ այդ օրվա նիստին, հիմնավոր չէ:

Պատասխանողը նշել է, որ անգամ եթե ինքն ստացած լիներ ծանուցագիրը, այնտեղ չի նշվում, որ ինքը կանչվում է դատական նիստին ներկա գտնվելու համար, հետևաբար ասել, որ ինքը չի ներկայացել վարույթն իրականացնող մարմնի պահանջով, անհիմն է, քանի որ վարույթն իրականացնող մարմինը տվյալ դեպքում իրեն դատական նիստին չի կանչել: Ուստի՝ Պատասխանողի մոտ չէր կարող առաջանալ վարույթն իրականացնող մարմնի կանչով ներկայանալու պարտավորություն:

Դատական սանկցիա կիրառելու մասին որոշման մեջ Պատասխանողին մեղսագրվում է Ժիրայր Սեֆիլյանին պաշտպանելու պարտականությունը ոչ բարեխիղճ կատարելու վարքագիծ՝ այն համարելով դատարանի նկատմամբ անհարգալից

վերաբերմունք: Ըստ Պատասխանողի՝ եթե անգամ ինքը ոչ բարեխիղճ է կատարում իր պարտականությունները վստահորդի նկատմամբ, դա որևէ ձևով չի կարող դիտվել անհարգալից վերաբերմունք դատարանի նկատմամբ:

Պատասխանողի կարծիքով, ՀՀ քրեական դատավարության օրենսգրքի 314.1 հոդվածի համաձայն՝ դատարանը սանկցիա կիրառում է, եթե անձը կատարում է դատարանի նկատմամբ անհարգալից վերաբերմունք պարունակող գործողություններ, մինչդեռ, հենց դատավորի որոշումից է երևում, որ Պատասխանողի չներկայանալը կապված է իր պաշտպանյալի դիրքորոշման հետ, որի մասին Պատասխանողը դատարանին ներկայացրել է երկու ապացույց: Պատասխանողը նշել է, որ դատարան չներկայանալը դատարանի նկատմամբ անհարգալից վերաբերմունքի դրսևորում չէ, այլ՝ իր պարտականությունը: Անգամ եթե ինքը սխալ է պատկերացնում իր պարտականությունը, միևնույն է, դա չի կարող իր կողմից դատարանին չհարգելու վերաբերմունք համարվել:

Վկայակոչելով ՀՀ քրեական դատավարության օրենսգրքի 314.1 և ՀՀ դատական օրենսգրքի 63-րդ հոդվածները՝ Պատասխանողը պնդում է, որ դատարանը չէր կարող իր նկատմամբ դատական սանկցիա կիրառել, քանի որ ինքը դատական նիստին ներկա չի գտնվել:

Վկայակոչելով ՀՀ քրեական դատավարության օրենսգրքի 304-րդ հոդվածը՝ Պատասխանողը պնդել է, որ դատարանը խտրական վերաբերմունք է դրսևորել փաստաբանների նկատմամբ, քանի որ հուլիսի 4-ի նիստին ներկա չեն գտնվել նաև դատախազները, սակայն դատարանը նրանց մասով սանկցիա չի կիրառել:

Վկայաբերելով ՀՀ քրեական դատավարության օրենսգրքի 314.1 հոդվածը և ՀՀ դատական օրենսգրքի 63-րդ հոդվածը՝ Պատասխանողը գտել է, որ դատական սանկցիա կարող է կիրառվել, եթե դատական նիստի բնականոն ընթացքը խոչընդոտվում է, իսկ իր չներկայանալը չի ազդել նիստի բնականոն ընթացքի վրա, քանի որ դատավորը հանգիստ շարունակել է դատական նիստը:

Պատասխանողը դատարանին մեղադրել է իր պաշտպանյալի իրավունքները խախտելու, նրա նկատմամբ նվաստացնող վերաբերմունք դրսևորելու մեջ:

Պատասխանողն ընդգծել է, որ եթե իր պաշտպանյալն իրեն չի լիազորել մասնակցել իր բացակայությամբ գործով հետագա վարույթին, ապա Պատասխանողի համար իր պաշտպանյալի նման դիրքորոշումը պարտադիր է:

Խորհրդի նիստին Պատասխանողը չի ներկայացել, թեև պատշաճ ծանուցվել է Խորհրդի նիստի վայրի և ժամի մասին:

3.3. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործ նախապատրաստողի եզրակացությունը, եզրակացության վերաբերյալ առարկությունները և գործի հանձնումը խորհրդին.

04.10.2017թ. կարգապահական վարույթի գործը նախապատրաստող անձ Արմեն Սիմոնյանը կազմել է եզրակացություն, որի համաձայն Պատասխանողի կողմից ներկայացված փաստաթղթերի ուսումնասիրության արդյունքում հաստատվել է, որ թիվ ԵԱԴԴ/0028/01/17 քրեական գործով 2017թ. հուլիսի 4-ին ժամը 11:00-ին նշանակված դատական նիստի վայրի և ժամանակի մասին ամբաստանյալ Ժիրայր Սեֆիլյանի պաշտպան, փաստաբան Տիգրան Հայրապետյանը ծանուցված է եղել: Նախապատրաստողը հաստատված է նաև համարել, որ թիվ ԵԱԴԴ/0028/01/17 քրեական գործով 2017թ. հուլիսի 4-ին ժամը 11:00-ին նշանակված դատական նիստին Տիգրան Հայրապետյանը չի մասնակցել:

Պատասխանողը չի ներկայացրել առարկություն եզրակացության վերաբերյալ:

Կարգապահական գործը Խորհրդին է հանձնվել 05.10.2017թ.:

Խորհրդի նիստը տեղի է ունեցել 2018 թվականի ժամը 19:30-ին, ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ, թիվ 12 սենյակ):

5. Գործի հանգամանքները՝ առկա ապացույցների վկայակոչմամբ.

Կանոնագրքի հավելվածը հանդիսացող «Փաստաբանի նկատմամբ կարգապահական վարույթի իրականացման կարգի» (այսուհետ՝ **Կարգ**) 22-րդ հոդվածի 3-րդ մասի համաձայն՝ *Պալատի խորհուրդը հիմք է ընդունում Նախապատրաստողի եզրակացությամբ հաստատված փաստերը, բացառությամբ այն դեպքի, երբ գործում գտնվող ապացույցները կամ Պալատի խորհրդին ներկայացված լրացուցիչ ապացույցները՝ սույն կարգին համապատասխան գնահատելու արդյունքում Պալատի խորհուրդն այլ եզրահանգման է գալիս:*

Խորհուրդը ուսումնասիրելով գործում առկա ապացույցները, հաշվի առնելով նաև Կարգապահական գործը նախապատրաստողի եզրակացությունը, հաստատված է համարում հետևյալ փաստերը՝

1. Փաստաբան Տիգրան Հայրապետյանը հանդիսանում է Ժիրայր Սեֆիլյանի պաշտպանը:
2. Թիվ ԵԱԴԴ/0028/01/17 քրեական գործով 30.06.2017թ. ժամը 11:00-ին տեղի ունեցած նիստում դատարանը որոշում է կայացրել ամբաստանյալ Ժիրայր Սեֆիլյանին դատարանի նիստերի դահլիճից հեռացնելու մասին:
3. Փաստաբան Տիգրան Հայրապետյանի կողմից 30.06.2017թ. դատարան է ներկայացվել հայտարարություն առ այն, որ Տիգրան Հայրապետյանը լիազորված չէ, առանց իր պաշտպանյալ Ժիրայր Սեֆիլյանի մասնակցության, մասնակցել դատական նիստի և ունի պաշտպանյալի ուղղակի հանձնարարությունն իր բացակայության ժամանակ չմասնակցել դատական նիստին, ուստի՝ չկարողանալով իր պաշտպանյալի դիրքորոշմանը հակառակ դիրքորոշում ընդունել, դատական նիստից իր բացակայությունը խնդրել է չդիտել որպես նախազահող դատավորի կարգադրություններին չենթարկվելու հանգամանք: Բացի այդ ինքը հնարավորություն չի ունեցել նախազահող դատավարին

ներկայացնելու իր պաշտպանյալի դիրքորոշումը նիստերի դահլիճում նախագահող դատավորի կողմից մտնելու ժամանակ ուղքի չկանգնելու հետ կապված: Տիգրան Հայրապետյանը նշել է նաև, որ նիստերի դահլիճում ներկա գտնվելը և գործի լուծման հետ կապված նման կարևոր հարցերի վերաբերյալ դիրքորոշում չհայտնելը խախտում է իր կողմից իր պաշտպանյալին պաշտպանելու գործընթացը:

4. Թիվ ԵԱԴԴ/0028/01/17 քրեական գործով 2017թ. հուլիսի 4-ին ժամը 11:00-ին նշանակված դատական նիստին ամբաստանյալ Ժիրայր Սեֆիլյանի պաշտպան Տիգրան Հայրապետյանը չի ներկայացել:
5. Թիվ ԵԱԴԴ/0028/01/17 քրեական գործով 2017թ. հուլիսի 4-ին ժամը 11:00-ին նշանակված դատական նիստին ամբաստանյալ Ժիրայր Սեֆիլյանի պաշտպան Տիգրան Հայրապետյանը պատշաճ ծանուցված է եղել դատական նիստի ժամանակի և վայրի մասին:

Նշված փաստերը հաստատվում են գործում առկա ապացույցներով, այդ թվում՝ Որոշմամբ, Պատասխանողի առարկություններով և կից ներկայացված ծանուցագրի պատճենով:

6. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից տրված տեղեկանքի համաձայն՝ Տիգրան Հայրապետյանը փաստաբան է հանդիսանում 21.09.2005թ-ից., և 2015-2017թթ. ընկած ժամանակահատվածում վերջինիս նկատմամբ 7 անգամ հարուցվել է կարգապահական վարույթ (7 ընթացիկ վարույթ), որոնց մեջ չի հաշվարկվում սույն կարգապահական վարույթը:

7. Պալատի խորհրդի պատճառաբանված եզրակացությունը և որոշումը.

Պալատի խորհուրդը գտնում է, որ փաստաբան Տիգրան Հայրապետյանը ենթակա է կարգապահական պատասխանատվության՝ Կանոնագրքի 4.1 կետի պահանջների խախտման համար հետևյալ պատճառաբանությամբ.

Օրենքի 39-րդ հոդվածի առաջին մասի համաձայն՝ փաստաբանը ենթակա է կարգապահական պատասխանատվության սույն օրենքի և փաստաբանի վարքագծի կանոնագրքի պահանջները խախտելու համար:

Կանոնագրքի 4.1 կետի համաձայն՝ փաստաբանը, ով ներկայանում է կամ մասնակցում է գործին դատարանի կամ արբիտրաժային տրիբունալի առջև, պետք է ենթարկվի այդ դատարանի կամ տրիբունալի կողմից կիրառվող վարվելակերպի կանոններին, այդ թվում հարգանքով վերաբերվել դատավորին և դատավարության մյուս մասնակիցներին: Այդ կանոններին ենթարկվելու պարտականությունը չի սահմանափակում փաստաբանի՝ դատավորի կամ արբիտրի գործողությունների դեմ առարկելու կամ այլ դատավարական իրավունքներից օգտվելու հնարավորությունը: Փաստաբանը դատարանի հանդեպ ճշգրիտ հարգանք և համակրանք դրսևորելու հետ

միաժամանակ պետք է իր վստահորդի շահերը պաշտպանի անկաշկանդ և անվախ՝ հաշվի չառնելով իր անձնական շահերը կամ ցանկացած հետևանքները, որոնք կպատահեն իր կամ ցանկացած այլ անձի հետ:

Այս կանոնը վկայակոչող է և հղում է պարունակում փաստաբանի և դատարանի հարաբերությունները կարգավորող այլ իրավական ակտին, տվյալ դեպքում՝ ՔԴՕ-ին:

ՀՀ քրեական դատավարության օրենսգրքի 73-րդ հոդվածի 5-րդ մասի համաձայն՝ պաշտպանը պարտավոր է՝

«(...)

2) ենթարկվել դատախազի, քննիչի, հետաքննության մարմնի, դատական նիստը նախագահողի օրինական կարգադրություններին.

3) մինչև ընդմիջում հայտարարելը առանց նախագահողի թույլտվության չլքել դատական նիստերի դահլիճը.

4) դատական նիստում պահպանել կարգուկանոն

(...)»:

Վերլուծելով վերը նշված կանոնների պահանջները, Խորհուրդը գտնում է, որ սույն գործով պարզման ենթակա է այն հանգամանքը, թե.

արդյո՞ք Պատասխանողն առանց հարգելի պատճառի դատական նիստին չի ներկայացել՝ դրանով անհարգալից վերաբերմունք դրսևորելով Դատարանի նկատմամբ:

Ըստ հաստատված փաստերի, թիվ ԵԱԴԴ/0028/01/17 քրեական գործով 30.06.2017թ. ժամը 11:00-ին տեղի ունեցած նիստում դատարանը որոշում է կայացրել ամբաստանյալ Ժիրայր Սեֆիլյանին դատարանի նիստերի դահլիճից հեռացնելու մասին: Թիվ ԵԱԴԴ/0028/01/17 քրեական գործով 2017թ. հուլիսի 4-ին ժամը 11:00-ին նշանակված դատական նիստին ամբաստանյալ Ժիրայր Սեֆիլյանի պաշտպան Տիգրան Հայրապետյանը չի ներկայացել: Դատական նիստին չներկայանալը (չմասնակցելը) Տիգրան Հայրապետյանը պատճառաբանել է այն հանգամանքով, որ իր պաշտպանյալի կողմից նման հանձնարարություն չունի: Բացի այդ ինքը հնարավորություն չի ունեցել նախագահող դատավորին ներկայացնելու իր պաշտպանյալի դիրքորոշումը նիստերի դահլիճում նախագահող դատավորի կողմից մտնելու ժամանակ ոտքի չկանգնելու հետ կապված: Պատասխանողը նշել է նաև, որ նիստերի դահլիճում ներկա գտնվելը և գործի լուծման հետ կապված նման կարևոր հարցերի վերաբերյալ դիրքորոշում չհայտնելը խախտում է իմ կողմից իր պաշտպանյալին պաշտպանելու գործընթացը:

Սույն կարգապահական գործում առկա ապացույցներով Պալատի Խորհուրդը հաստատված է համարում, որ 30.06.2017թ. ժամը 11:00-ին տեղի ունեցած նիստից հետո նշանակված դատական նիստերին Պատասխանողը չի ներկայացել և դրանով պայմանավորված հնարավորություն չի ունեցել ներկայացնելու իր պաշտպանյալի դիրքորոշումը նախագահող դատավորին: Խորհուրդն արձանագրում է, որ 04.07.2017թ. դատական նիստին Պատասխանողը ծանուցված է եղել:

Պալատի Խորհուրդը կարևոր է համարում սույն որոշմամբ տալ այն հարցի պատասխանը, թե՞ արդյոք դատական նիստին չմասնակցելու վստահորդի

հանձնարարությունը օրինական հանձնարարություն է, և արդյո՞ք փաստաբանը պարտավոր էր կատարել այդ հանձնարարությունը:

ՀՀ քրեական դատավարության օրենսգրքի 68-րդ հոդվածի 1-ին մասի համաձայն՝ պաշտպան է այն փաստաբանը, որը քրեական գործով վարույթի ընթացքում ներկայացնում է կասկածյալի կամ մեղադրյալի օրինական շահերը և նրանց ցույց է տալիս իրավաբանական օգնություն՝ օրենքով չարգելված բոլոր միջոցներով:

Նույն օրենսգրքի 73-րդ հոդվածի 5-րդ մասի 1-ին կետի համաձայն՝ պաշտպանը պարտավոր է կասկածյալին և մեղադրյալին իրավաբանական օգնություն ցույց տալու համար ներկայանալ քրեական վարույթն իրականացնող մարմնի կանչով:

«Փաստաբանության մասին» ՀՀ օրենքի 20-րդ հոդվածի առաջին պարբերության համաձայն՝ «Փաստաբանն իրավունք չունի իրավաբանական օգնություն ստանալու համար դիմած անձի հանձնարարությունն ընդունելու, եթե՝

1) այն ակնհայտ անօրինական բնույթ է կրում.

(...)

Կանոնագրքի 3.1.6 ենթակետի համաձայն՝ եթե վստահորդի հանձնարարությունը և նրա համար ցանկալի արդյունքի հասնելու միջոցները օրինական չեն, ապա փաստաբանը պետք է վստահորդին պարզաբանի դրանց կիրառման անթույլատրելիության մասին և ցույց տա նույն կամ նման արդյունքի հասնելու հնարավոր օրինական ճանապարհը, և եթե այդուհանդերձ չի հաջողվում վստահորդի հետ համաձայնության գալ և նրան հետ պահել անօրինական միջոցների կիրառման մտադրությունից, ապա փաստաբանը պարտավոր է հրաժարվել վստահորդի հանձնարարությունը ընդունելուց:

Նշված կանոնների համակարգային վերլուծությունից ուղղակիորեն հետևում է, որ քրեական գործով պաշտպանն պաշտպանը պարտավոր է կասկածյալին և մեղադրյալին իրավաբանական օգնություն ցույց տալու համար ներկայանալ քրեական վարույթն իրականացնող մարմնի կանչով, հետևաբար օրենքով արգելվող այդպիսի վարքագիծ դրսևորելուն ուղղված վստահորդի հանձնարարությունն օրինական չի կարող լինել: Ոչ օրինական հանձնարարությունն ընդունելուց փաստաբանը պարտավոր է հրաժարվել: Փաստաբանն իրավունք չունի և չպետք է վստահորդից այնպիսի հանձնարարություն ընդունի, եթե ի սկզբանե այն հակասում է օրենքին կամ վարքագծի կանոններին:

Վստահորդի ոչ օրինական հանձնարարությունը փաստաբանի համար պարտադիր համարելու դեպքում, փաստաբանը կկորցնի իր անկախությունը և ստիպված կլինի ոչ իրավաչափ վարքագիծ դրսևորել, ինչն անթույլատրելի է:

Պալատի խորհուրդը եզրակացնում է, որ Պատասխանողի արարքը կատարված է դիտավորությամբ, այսինքն՝ վերջինս գիտակցել է իր վարքագծի ոչ իրավաչափ բնույթը:

Պալատի խորհուրդը գտնում է, որ սույն Տիգրան Հայրապետյանն առանց հարգելի պատճառի դատական նիստին չի ներկայացել, հետևաբար դիտավորությամբ այդպիսի վարքագիծ դրսևորելով խախտել է Կանոնագրքի 4.1 կետի պահանջը:

Կարգապահական տույժի ընտրությունը

Օրենքի 39.9 հոդվածի 2-րդ մասի համաձայն՝ փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը: Կարգապահական տույժ կիրառելիս փաստաբանների պալատի խորհուրդը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Անդրադառնալով նշանակվելիք կարգապահական տույժի տեսակին՝ Պալատի խորհուրդը՝ հաշվի առնելով վերոհիշյալ հանգամանքները, այդ թվում՝ խախտման բնույթը և փաստաբանի անձը բնութագրող հանգամանքները, գտնում է, որ փաստաբան Տիգրան Հայրապետյանի նկատմամբ պետք է կիրառել տույժ՝ նկատողության ձևով:

Վերոգրյալից ելնելով և ղեկավարվելով «Փաստաբանության մասին» Հայաստանի Հանրապետության օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7.- րդ հոդվածի 5-րդ մասի 1-ին կետի, 39.9.-րդ հոդվածի 1-ին մասի 1-ին կետի, ՀՀ Փաստաբանների պալատի կանոնադրության 16.26-րդ կետի, Կարգի 30-րդ հոդվածի 5-րդ մասի 1-ին կետի պահանջներով խորհուրդը՝

Ո Ր Ո Շ Ե Ց՝

1. Փաստաբան Տիգրան Հայրապետյանին (արտոնագիր՝ թիվ 159) ճանաչել մեղավոր Կանոնագրքի 4.1 կետի պահանջների խախտման համար:

2. Փաստաբան Տիգրան Հայրապետյանի (արտոնագիր՝ թիվ 159) նկատմամբ կիրառել կարգապահական տույժ՝ նկատողություն:

3. Հանձնարարել Պալատի աշխատակազմի ղեկավարին՝ սույն որոշման մասին հրազեկել կողմերին:

Ծանոթություն. Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

ՀՀ փաստաբանների պալատի խորհրդի
կարգապահական գործով
նիստը նախագահող՝

Տիգրան Խուրշուդյան

**13 փետրվարի 2018թ.
թիվ ԿԳ/16-Ա
ք. Երևան**